

## **Präsidentinne Bricht 2023/2024**

Scho wieder isch e ganzes Joor verbi

An däm Punkt bin ich au scho öfters gsi

S Blatt isch no leer – mi Kopf leider au

E Vers sött jetzt cho, das weiss ich genau

Also fang ich doch grad mit dr GV 23 aa

Die hämmer vor eim Joor – genau do gha

Dr Inhalt isch glaub allne klar

Im Protokoll stoht alles – schwarz uf wiss und wahr

Nur eins, das hani niene gläse oder gfunde

Jetzt riss ich bi dr Verena wohl uf e chlini Wunde

Ihri Füürattacke bim Znacht

Wo s Brotchörbli brennt het- e heissi Sach!

Doch mache mir witer, s Joor isch no lang

Dr nächschi Aalass stoht im Jooresprogramm

Dr Maibummel – ganz genau - am 7. Mai isch das gsi

Näbscht vielle Fraue isch au dr Eddy – jo e Maa!! drbi gsi

Super organisiert vo dr Jeannette und dr Conny

Im Cafe «Gnuss» e feins Zmorge mit und ohni

E Stück mit em Bus, denn z Fuess uf Rhyfelde

Unterwägs dr Apero - serviert vom Ueli und Harald, eusne Helde

Am 24. Juni stohts Turnfescht im Jooresprogramm

Genuai Details hani nid, nur s Wo und s Wann!

In Lupfig-Scherz isch das gsi

Aber es muess guet und luschtig gsi si

Bald scho fange d Schuelferie aa  
Am 3. Juli hämmer drum die letschi Turnstund gha  
Dank Eliane und Anita, e tolle Abschluss im Spitzgrabe, im Wald  
Mit Grill Profis Rico und Markus, aber– denn heissts ... schöni Ferie und bis bald

Am 19./20. August stöht euse 2-Täger uf em Programm  
Organisert ha de ich -- verzelle chani drum us erschter Hand  
Mit em Zug ins Wallis –Halt in Visp -Wydegustation in St. Jodern in de Berge obe  
Den gohts witer nach Leukerbad zum Bade, do säg i nur «Yvonne und Rutschbahn  
abe»

Zeche futsch, gschwulle und tuet weh – will nid in Wanderschueh  
Am nächschte Morge ischs klar- dr Zeche wott heim – er brucht Rueh  
Mir fahre uf e Gemmi mit Sack und Pack , doch ohni Yvonne wie schad!  
Laufe umme e Tuubesee - gönne eusne Füess e Bad

S isch heiss und heiss und wirklich heiss- sogar heisser  
Mir sueche e Plätzli am See im Schatte – unser Heidi wird immer leiser  
Dr Rucksack isch schwer und d Schueh tüen weh und d Lunge au  
Doch hälfe loh – nei – aber es wärs richtig – das weiss sie genau

Doch denn dörfe mir helfe– s Häppie End isch do  
Im Restaurant Sunnbüehl e Glace no - loht eusi Herze höher schlo  
Denn abe mit dr Gondle, uf e Zug «quasi « ganz allein  
Dr Usflug isch schön gsi und in dr 1. Klass heim- dasch denn fein

Denn stöht dr Pontonieraalass am 26./27. August uf em Kalender  
Mir helfe am Buffet, Zapfhahne und im Nochschub – das spricht Bänder  
D Arbet isch hart, aber d Stimmig isch toll und au guet  
Und dr Batze uf em Konto isch super grosszügig –Pontonier- ich nimm dr Huet!

Jetzt wird's langsam küehler und Nächt länger und dr 11.11 stöht vor dr Tür  
S BBZ Konzert und unser Ysatz sind gfrogd drfür  
Alles wie immer ich weiss nüt gross zverzelle  
Usser, dass ich nach Mitternacht das Geburi-Ständli gar nid ha welle.

Mit Gmeind und BBZ e neue Aalass kreiert, er isch parat  
Am 10. Dezember isch neu Jubilare-und Senioreweihnacht zämme, nümm seperat  
Mir schmeisse de Aalass und s Echo isch durchwegs guet  
Das macht doch fürs nächschi Joor so richtig Muet.

Jetzt chunnt no euses eiges Weihnachtsfescht am Mäntig druf  
Es isch dr 11. Dezember und d Susann und d Christine decke uf  
Bim Hasler, Esse so fein und nochher no Spieli so guet  
Säg nur Lotto!!! Und Danke! Und nimm scho wieder mi Huet

So jetzt isch mi Liste vo Aaläss leer  
Zum Verzelle find ich au nüt mehr  
S Joor isch um  
Und ich wird stumm?

Nei – dangge will ich euch natürig und zwar sehr  
Viell isch passiert das Joor und no mehr  
Doch zäme ischs schöner -im Team und nid allei  
Drum hebet euri Gläser - Proscht uf euse Verei!!